

字典

字學典第一百二十五卷

書家部法書名家列傳三十一

明九 王思任

按山陰縣志王思任字季重號遂東山陰人萬曆乙未進士知興平當塗青浦三縣袁州推官稍遷刑工二部主事出爲九江府世稱其詩歌書法與董思白陳仲醇相伯仲

范允臨

按蘇州府志范允臨字長倩吳縣人舉萬曆乙未進士授南京兵部主事歷遷福建布政司叅議未至任而歸日與故人知交遨遊山水間以文章翰墨倡率後進尤工法書遠近購書者雖寸縑尺幅藏弆以爲拱璧與華亭董其昌齊名

尹伸

按列朝詩集小傳尹伸字子求宜賓人萬曆戊戌進士仕至河南左布政讀書汲古精於鑒賞日課楷書五百字寒暑不輟

張文暉

按江寧府志張文暉字孚之萬曆二十三年進士知台州府

按遜園居士傷逝記文暉善真行

卜履吉

按存徵錄卜履吉字中立號訥齋登萬曆戊戌進士官兵憲

按客座贅語卜中立行書師章草

簡勁無媚骨望之肅然類其爲人

曹徵庸

按平湖縣志曹徵庸字遠生別號積雪萬曆戊戌進士官至山西汾郡守爲人清疎雋遠雅有潔癖
書法亦適逸爲世推重

陳勳

按湧幢小品陳勳字元凱閩縣人魁庚子辛丑鄉會榜歷文學博士戶部郎謝病歸終日扃門却埽
詩入唐人室字與畫皆精妙人寶貴之

馮元鑑

按平湖縣志馮元鑑字三峨萬曆庚子舉人授合肥教諭陞涪州知州乞歸結廬雙谿之濱生平高雅善文尤工書法

劉世教

按海鹽圖經劉世教字少彝海鹽人萬曆庚子舉北闈謁選授閩清令爲詩泚泚唐音文彷彿六朝儷體兼工行草尺牘小文更雋永多寶藏者

傅淑訓

按青溪遺藁傅淑訓字咨伯萬曆辛丑進士爲戶部尙書書法晉唐小行楷尤工得洛神十三行風味

張以誠

按松江府志張以誠字君一華亭人萬曆辛丑進士廷對第一人授翰林院修撰官至右諭德文章宗蘇詩擬孟襄陽小楷規模大令清勁有法

徐光啟

按松江府志徐光啟字子先上海人萬曆甲辰進士選庶吉士嘗學聲律工楷隸及是悉屏去習天文兵法屯鹽水利諸策授簡討崇禎中爲禮部尙書文淵閣大學士贈少保謚文定

李流芳

按列朝詩集小傳李流芳字長蘅嘉定人萬曆丙午舉於鄉再上公車不第絕意進取書法規摹東坡

趙嘏

按列朝詩集小傳趙嘏字子函一字屏國盩厔人萬曆己酉領鄉薦所居近周秦漢唐故都古金石名書多在焉援據考證略仿歐陽公趙明誠洪丞相三家名曰石墨鐫華自謂窮三十年之力多都元敬楊用修所未見也 按石墨鐫華序余八歲時朱秉器先生手虞伯施書使予臨摹余私心竊慕古人每獲一名碑必摩弄累日不忍釋去片石隻字輒疏記之

尹嘉賓

按列朝詩集小傳尹嘉賓字孔昭江陰人萬曆庚戌進士除中書舍人歷兵部郎中陞湖廣提學副

使字畫瘦勁晚更雜篆隸出之

宋奎光

按蘇州府志宋奎光字培巖常熟人萬曆壬子舉人能詩文工書法知龍川縣改寧海

王心一

按歸田園詩集小傳王心一字純甫別號元珠又號半禪野叟萬曆癸丑進士授行人累遷刑部左侍郎署尙書事書祖坡僊極精妙

俞琬綸

按蘇州府志俞琬綸字君宣長洲人萬曆癸丑進士任西安令風流文采掩映一時臨池最勝

蔣如奇

按書史會要蔣如奇字一先號盤初宜興人萬曆丙辰進士官湖西大參書法瀟灑絕俗董思白稱其天骨超逸功力復深所鑄有晉唐宋諸大家帖行世

楊嘉祚

按書史會要楊嘉祚字邦隆號寨雲江西太和人文貞公之後也中萬曆丙辰進士官至廣西副使
書法清古與王雅宜筆法相類

來復

按列朝詩集小傳來復字陽伯三原人萬曆丙辰進士歷官布政使備兵揚州性通慧詩文書畫之
外琴棋劍器百工伎藝無不通曉

曹履吉

按書史會要曹履吉字提遂當塗人萬曆丙辰進士官光祿少卿詩字有晉唐遺韻

沈嗣選

按嘉興縣志沈嗣選字仁舉萬曆甲午舉人志行高潔不仕書法本歐虞

姚履旋

按江寧府志姚履旋字允吉萬曆四十六年貢士爲揚州學博陞巴東知縣 按客座贅語允吉

真行法率更稍益以己意簡峭中微帶風貌故自彬彬

李開芳

按蒼霞餘草李開芳字伯東別號還素閩永春人萬曆中成進士授主事累遷南太僕卿臨池之技縱橫跌蕩不減素師 按書史會要開芳以篆隸八分作署書自謂得斯邈遺意體勢雖涉奇怪袤丈之字略無怯澀亦人所難

黃汝亨

按書史會要黃汝亨字貞父號寓庸居士武林人萬曆進士仕至江西學憲行草合蘇米之長

傅光宅

按書史會要傅光宅字伯俊別號金沙居士聊城人萬曆進士仕終四川學憲書模黃豫章蒼鬱有致

朱多燼

按藩獻記朱多燼字仲美瑞昌榮安王曾孫也封奉國將軍行草得鍾王書法亦自珍惜之每一紙出好事者重價購去比之蘭亭禊帖云

朱多炆

按書史會要朱多炆字貞吉號瀑泉弋陽王孫封奉國將軍詩才警敏行草宗米南宮雜以古字自成一體

朱多燠

按書史會要朱多燠字垣佐號崇謙一號覺菴樂安靖莊王孫封奉國將軍力學不倦書法初師趙文敏後法聖教序

朱謀璣

按書史會要朱謀璣字弘之博學工詩行草法聖教序楷法歐陽詢

朱謀璣

按隱之先生懿行紀略朱謀璣字隱之號八桂封奉國將軍特擅臨池鸞鏘虎躍標幟一家屏障榜額得手筆爲重又喜陶氏書史會要有益書家乃撫有明一代續其卷後

朱謀璋

按書史會要朱謀埠字鬱儀石城王孫封鎮尉萬曆中理藩政博雅好古尤研精於六義所著有六書貫玉等書又考訂大禹碑周宣石鼓比干墓銘手自摹臨而詮釋之曰三古文釋

朱統鐙

按書史會要朱統鐙字孝穆謀埠第三子封輔尉博雅能如其父喜書法以懸腕中鋒爲貴於諸帖能淹貫故作字必有所本蓋以學勝者

朱謀埠

按羅治十二故人傳朱謀埠字素臣號謙山瑞昌王之枝孫封輔國中尉雅好草書遠宗懷素近法張東海間用淡墨枯筆出己意迫視之若雲篆煙書口噤不能讀

宋之儒

按茅鹿門集宋之儒字文衡號梅川吳江人好詩奕善爲摹畫顏歐以下書法

金殿

按江寧府志金殿字子鎮號後林上元人萬曆時貢士官處州府教授 按遜園居士傷逝記金

殿小楷師文徵仲行書師聖教序

謝肇淛

按小草齋集小傳謝肇淛字在杭官工部草聖如張伯英行書如王右軍蚤歲釋褐宦情泊如朱輪停時卽攜一編高坐匡牀命侍姬焚龍涎吸清茗半盞臨蘭亭一過

朱音

按客座贅語朱音金陵人官太守行書師鐵門限圓媚流麗翩翩動人

顧履中

按海鹽縣志顧履中字雲樓工署書篆隸諸體以事抵法萬曆初營建皇極殿成題棹楔者輒議辟大學士張居正薦之筆法應對稱旨擢內閣中書賜名復中

范文明

按草訣辨疑序范文明字晦叔萬曆時人嫺詩賦攻六書著草訣辨疑

詹景鳳

按書史會要詹景鳳字東圖休寧人初爲南豐掌教終吏部司務深於書學用筆不凡如冠冕之士端莊可敬狂草若有神助變化百出不失古法論者謂可與祝京兆狎主當代

袁表

按列朝詩集小傳袁表字景從閩縣人萬曆初授中書舍人遷戶部郎終黎平知府 按詹氏小

辨袁表善書

黃道充

按曼寄軒集黃道充字于泰號楚源歙人官中書舍人工詩文好奇字及異書備事書宗鍾王以染翰拜神廟賜者再又好古書畫器物品題鑒別能一一指所從來可謂淹博矣

林鳳華

按漱石居集林鳳華字子夏號丹壺居士平湖人精楷法在右軍大令間

張仁

按閩書張仁字守性沙縣人居貧力學善詩精楷書萬曆中爲南雄訓導

衛可徵

按高淳縣志衛可徵山陽人萬曆十五年爲高淳訓導喜古文詞工大小書法

胡宗仁

按列朝詩集小傳胡宗仁字彭舉上元人隱于冶城山下生而偉壯美髯晚年衲衣拄杖反手徐步鬚髯從風飄颻市人皆目爲神仙 按五雜俎宗仁善漢隸得中郎遺法

郭天中

按列朝詩集小傳郭天中字聖僕先世莆田人其祖以避寇徙秣陵不事生業專精篆隸之學窮厓斷碑搜訪摹榻寢食都廢晚年隸書益進師法秦漢最爲逼古

王逢年

按列朝詩集小傳王逢年字舜華初名治字明佐崑山人少爲諸生試經義多入古文奇字爲有司所黜作五敵詩謂慢世敵嵇康綴文敵馬遷賦詩敵阮籍述騷敵屈宋書法敵二王 按崑山人物傳逢年書學十九體必歸晉法嘗自號小王右軍

鄔佐卿

按列朝詩集小傳鄔佐卿字汝翼丹徒人楷書臨黃庭經詩工唐律不與人爭長用自娛悅而已

沈春澤

按列朝詩集小傳沈春澤字雨若常熟人才情煥發能詩善草書移居白門

曹大同

按弇州續藁曹大同字子貞通州人貢入太學授光祿寺丞書法亦道婉可愛

周之冕 華之方

按弇州續藁古隸自文符詔父子歿幾遂絕絃而周之冕華之方二君子頗挾許昌孔廟之祕

周芝山

按弇州續藁周芝山年八十時兩目俱枯令人以手擬筆卽縱意爲之出入雙井襄陽風骨偉然

羅文瑞

按弇州續藁題羅文瑞所書醫無閭碑後云萬曆甲戌少司馬梁公夢龍奉命犒師勒續於醫無閭

山而歛士羅文瑞書之結法自清臣誠懸是以適莊而不散骸

周炳文

按占星堂集周炳文字伯從別號明宇仕爲都察院都事好吟咏雅意臨池摹歐虞真蹟一時海內名公如王元美吳明卿輩稱善相屬

沈熙

按環溪集沈熙號晉齋華亭人善書學鍾學王又學爲歐種種成家蓄古書畫搜剔水石時花種竹不問門外事

程福生

按詹氏小辨程福生字孟儒江西玉山人篆法壽承隸法徵仲小楷法麻姑仙壇又法黃庭草法章草按廣信府志程福生精書法燕京承天門關王廟石碑其真蹟也八分書特妙

趙仕禎

按詹氏小辨趙仕禎字彥卿樂清人官中書舍人楷法歐率更行法聖教序分法文太史皆成章而

致亦清

李寧儉

按詹氏小辨李寧儉金陵人少保惟寅弟徑寸草法孫過庭大草法文壽承並有佳致

吳元滿

按書史會要吳元滿字敬甫歙人好六書自三代及秦漢鼎彝碑銘皆淹貫於中所著有六書正義等書

文元善

按文氏族譜文元善字子長號虎丘和州公嘉子書畫逼真和州公

陳繼儒

按松江府志陳繼儒字仲醇華亭人爲高才生與同郡董其昌齊名年二十九取儒衣冠焚棄之結茅崑山之陽後居東佘山工詩文雖短翰小詞皆極風致 按書史會要繼儒書法蘇長公故於

蘇書雖斷簡殘碑必極搜採手自摹刻之曰晚香堂帖

趙宣光

按蘇州府志趙宣光字凡夫太倉人祖汴舉嘉靖辛卯解元戊戌成進士父樛生隱士也宣光生而豪貴入貲爲國子生中歲折節讀書卜地於吳之天平山葬親傾家開鑿搜巖剔穴遂爲西山奇勝之地廬居墓傍足不及城市著書數十種尤精精字學說文長箋其所獨解篆書尤精 按書史會要宣光篤意倉史之學創作草篆蓋原天璽碑而小變焉繇其人品已超書亦不躡遺蹟

趙均

按初學集趙均字靈均凡夫之子從其父傳六書之學又從燕山僧見林授大梵字并諸國字母移日分夜父子自相講習

葛雲蒸

按江寧府志葛雲蒸字如龍爲郡諸生屢試不利乃謝去隱於鳳凰臺畔 按遜園居士傷逝記雲蒸楷書學歐陽率更

孫謀